

明

會

要

明會要卷六十七

永新龍文彬纂

刑四

贖罪

明律頗嚴凡朝廷有所矜恤限於律而不得伸者一寓之於贖例所以濟法之太重也又國家得時藉其入以佐緩急而實邊足儲振荒官府頒給諸大費往往取給於贖贖二者故贖法比歷代獨詳

贖例有二一罰役一納鈔而例復三變罰役者後多折工值納鈔鈔法既壞變爲納銀納米然運灰運炭運石運輓

之名尙存也

初令罪人得以力役贖罪死罪拘役終身徒流按年限笞杖計日月或修造或屯種或煎鹽炒鐵滿日疏放疏放者引赴御橋叩頭畢送應天府給引甯家合充軍者發付陝西司按籍編發後皆折納工價惟赴橋如舊

已上刑
法志

洪武六年正月辛酉江西行省商民坐沮壞鹽法刑官擬以亂法罪當死太祖曰愚民沮壞鹽法原其情不過貪利初無他心乃悉免死輸作臨濠

工部尙書王肅坐法當笞太祖曰六卿貴重不宜以細故辱命以俸贖罪後羣臣誑誤許以俸贖始此

八年二月甲午敕刑官自今凡雜犯死罪者免死輸作終身徒流罪限年輸作官吏受贓及雜犯死罪當罷職役者謫鳳陽屯種民犯流罪者鳳陽屯種一年然後輸作

二十五年十二月癸亥諭刑部尙書楊靖等曰自今惟犯十惡并殺人者論死其餘死罪皆令輸粟北邊以自贖力不給者或二人或三人并力輸運仍令還家備貲以行上

世法錄

三十年命部院議定贖罪事例凡內外官吏犯笞杖者記過徒流遷徙者俸贖之三犯罪之如律

刑法志

成祖卽位之三月諭刑部都察院曰前敕法司令囚人入

米贖罪以省轉輸之勞近聞有貧不能致米憂感而死者
期欲生之乃速之死非朕本意自今凡人命十惡死罪強
盜傷人者依律處決其餘死罪及流罪令挈家赴北平種
田流罪三年死罪五年後錄爲良民其徒罪令煎鹽杖罪
輪役如故自願納米贖罪者聽

世法錄

永樂十一年五月命法司定議死罪情重者殺之情輕者
得納贖斬八千貫絞六千貫流徒以下納鈔有差無力者
發天壽山種樹

三編

仁宗卽位諭都察院言輸罰工作之令行有財者悉倖免

宜一論如律

刑法志

宣德元年正月赦死罪以下運糧宣府自贖

三編

二年七月令官吏軍民入米贖罪自死罪至笞四十分十等納米百石至二百石有差納者贓罪得不死徒流以下皆復用不能納者雖笞杖久繫不釋

三編

御史鄭道甯言納

米贖罪朝廷寬典乃軍儲倉拘繫罪人無米輸納自去年二月至今死者九十六人刑部郎中俞士吉因奏囚無米者請追納於原籍匠仍輸作軍仍備操若非軍匠則追還所隸州縣遣之詔從其奏

刑法志

四年六月詔贓吏不得贖罪

三編

五年九月更定在外罪囚贖罪例除真犯外文職官吏犯

明倫彙編 家範典 卷之二十七
三
賊者送京師如律處治軍職犯死罪者令納米贖罪畢日
送京師調衛非贓罪則不分輕重俱盡納米畢日還職役

同上

正統間侍講劉球言輸罪非古自公罪許贖外宜悉依律

時不能從

刑法志

成化二年二月定納豆贖罪例八月定納馬贖罪例

大政記

嘉靖七年重脩條例奏定贖例在京則做工運囚糧運灰
運甌運水和炭五等運灰最重運炭最輕在外則有力稍
有力人等其有力視在京運囚糧稍有力視在京做工年

月爲折贖

刑法志

明充軍之例最嚴有終身有永遠永遠者罰及子孫皆以實犯死罪減等者充之嘉靖間有請開贖軍例者世宗曰律聽贖者徒杖以下小罪耳死罪矜疑乃減從謫發不可贖御史周時亮復請廣贖例部議審有力者銀十兩得贖三年以上徒一年稍有力者半之而贖軍之議卒罷御史胡宗憲言南方之人不任兵革其發充邊軍者宜令納銀自贖部議以爲然因擬納例上帝曰豈可豫設此例以待犯罪之人復不允上同

萬厯中浙江饑或請令罪人出粟除罪刑部尙書李世達言法不可廢甯赦毋贖赦則恩出於上法猶存贖則力出

於下人滋玩識者躓之

李世達傳

赦宥

洪武元年八月己卯大赦

本紀

七年十一月丙寅詔曰釋罪宥愆前代未嘗輕發蓋恐姦徒得爲漏網之魚良善含冤而不伸古人謂小人之幸君子之不幸豈不信然爾中書其條款獄情若果眞犯但笞罪以上俱各不原其餘註誤過失因人致罪者悉宥之

大訓記

十三年五月甲午雷震謹身殿乙未詔告天下曰朕以菲德託於萬姓之上奉天勤民於茲十有三年矣間者宰輔

非才肆奸亂政朕按法誅之然昧於知人實朕之過上天

垂戒豈偶然哉可大赦天下

昭代
典則

十四年三月丙戌詔曰朕撫育黔黎十有四年獄訟未清
良由委任非人致陷刑辟今大赦天下與民更始

三編

十七年三月甲子大赦天下

三十一年閏五月己卯惠帝卽位大赦天下

永樂四年十二月辛卯赦

五年六月甲午詔自永樂二年六月後犯罪去官者悉宥
之八月庚子錄囚雜犯死罪減等論戍流以下釋之

七年三月丙寅詔起兵時將士乃北京効力人民雜犯死

罪咸宥之充軍者官復職軍民還籍伍

已上本紀

十九年正月遷都北京赦

二十二年八月丁巳仁宗卽位大赦天下十一月壬申朔詔禮部建文諸臣家屬在教坊司錦衣衛浣衣局及習匠功臣家爲奴者悉宥爲民還其田土言事謫戍者亦如之

已上

三編

洪熙元年六月庚戌宣宗卽位大赦天下

宣德元年十二月辛未錄囚宥免三千餘人

二年十一月己亥以皇長子生大赦天下

八年四月理冤獄減殊死以下赦軍匠在逃者罪

十年正月壬午英宗卽位大赦天下

正統四年三月己酉詔赦天下

六年十一月甲午朔以宮殿成大赦

八年五月戊寅雷震奉天殿鴟吻敕脩省壬午大赦

十四年九月癸未景帝卽位大赦天下十二月丙辰大赦
景泰元年八月庚寅以上皇還京師赦天下

三年五月甲午立子見濟爲皇太子大赦天下

天順元年正月丙戌詔赦天下

五年七月庚戌大赦

八年正月乙亥憲宗卽位大赦天下

明倫彙編 家範典 卷之二
七年十一月甲寅立皇子祐極爲皇太子大赦

十一年十一月癸丑立皇子祐檜爲皇太子大赦

二十一年正月庚寅以星變詔赦天下

二十三年九月壬寅孝宗卽位大赦天下

宏治五年三月戊寅立皇太子大赦

十一年十二月壬子以清甯宮災詔赦天下

十八年五月壬寅武宗卽位大赦天下

正德五年四月辛亥詔赦天下

十六年四月癸卯世宗卽位大赦天下

嘉靖三年四月己酉大赦

九年十一月己酉郊祀禮成大赦天下

已上本紀

十二年八月乙未以皇子生詔赦天下惟大禮大獄得罪

者及建言諸臣馮恩等皆不原

三編

十五年十一月戊午以皇子生詔赦天下

按邵經邦傳嘉靖十六年皇子

生大赦茲據本紀及史概十二月癸亥以上兩宮徽號詔赦天下

十七年十一月辛卯祀天於南郊詔赦天下

十八年二月庚子朔立皇太子辛丑詔赦天下

四十五年十二月壬子穆宗卽位大赦天下

隆慶二年三月辛酉立皇太子詔赦天下

六年六月甲子神宗卽位詔赦天下

萬曆十年九月丙辰以皇長子生詔赦天下

本紀上

三十三年十二月乙卯以皇長孫生詔赦天下

本紀

吏部尙

書楊時喬列上遷謫鄒元標等九十六人削籍范雎等一

百十人皆不報

楊時喬傳

四十二年四月丙戌以大行皇太后遺命赦天下

四十八年八月丙午光宗卽位大赦天下

泰昌元年九月庚辰熹宗卽位詔赦天下

天啟三年閏十月壬寅以皇子生詔赦天下

五年十月庚子以皇子生詔赦天下

七年八月丁巳莊烈帝卽位大赦天下

崇禎二年二月庚寅皇長子生赦天下

三年二月庚申立皇太子大赦

已上本紀

赦宥雜錄

洪武六年七月有子犯法父賄求免者御史欲并論其父

太祖曰子論死父救之情也但論其子赦其父

世法錄

二十年四月己酉詹徽奏有軍人犯罪當杖其人嘗兩得罪而免今復不悛宜并論前罪誅之太祖曰前罪既宥今復論之則不信矣仍杖而遣之

同上

二十五年十二月天策衛卒吳英父得罪繫獄英詣闕陳情願沒入爲官奴贖父罪太祖曰汝父罪不可貸念汝愛

父至性特曲法宥之

大訓記

二十六年十月乙亥大理寺奏四川民以輸糧踰期及移易者坐法當誅太祖曰四川水陸險峻輸輓良難故有失期及移易者其悉宥之給道里費遣還

同上

沅陵知縣張傑當輸作自陳母賀當元季亂離守節今年老失養帝謂可勵俗特赦之赦傑令終養

刑法志

給事中彭興民坐繫獄其父上表訴哀立釋之且免同繫十七人

同上

永樂元年十二月丁丑錦衣衛臣奏福建送至亂寇若干人法當棄市上曰朕嘗許以不殺今殺之是不信來者之

路塞矣俱宥之謫戍邊

世法錄

江浦知縣周益以罪當刑妻梅訴益母老無養請代死帝

憫而宥益

通典

永樂四年五月丁酉都督程達有罪上特宥之命隨西平

侯沐晟立功自贖

世法錄

九年五月新進士王彥白陳臣家與奸惡外親有連今聞

朝廷已下本貫籍沒臣家臣實罪人應就繫上諭三法司

曰學至於中進士亦成材矣成材勿棄其有罪能自陳可

矜併其家宥之

同上

仁宗卽位錦衣衛指揮王節等奏上直校尉屢失所懸銅

牌請治罪上曰昨日下詔赦有罪今日遽罪赦前事何以

示信其勿治

大訓記

宣德七年八月宥誹謗者罪有男子大呼西華門外語涉
訕謗守門者執至帝前呼仍不已羣臣請下法司帝曰聖
人之世設誹謗木以來告者此人甯可罪耶其釋之

三編

八年詔書罪囚自十惡外並減一等有重囚三十餘人例
不得赦刑部侍郎段民於詔書未下之先奏請寬減後有
旨報決乃復追還而逃已數人民自陳狀帝責之復命宥
民等罪給事中年富等執奏民等不當宥上曰已宥之矣
不欲反覆其封章示之自勵

大訓記

景泰中陽穀主簿馬彥斌當斬其子震請代死特宥彥斌

編震充邊衛軍

通典

成化元年二月詔釋戍邊陳循江淵俞士悅並王文子謙

子璿回籍

同上

世宗雖屢停刑尤慎無赦廷臣屢援赦令欲宥大禮大獄
暨建言諸臣益持不允

嘉靖四十一年三殿成羣臣請頒赦帝曰赦乃小人之幸

不允

已上刑
法志

萬厯十二年二月釋建文諸臣外親之謫戍者自齊泰黃
子澄外其坐方孝孺連及者俱免之於是浙江江西福建

四川廣東得免者凡三千餘人至光宗時併泰子澄戚屬
後裔亦俱放還

三編

登聞鼓

洪武元年十二月己巳置登聞鼓於午門外一御史日監
之非大冤及機密重情不得擊擊卽引奏敢阻告者罪後
移設於長安右門外六科錦衣衛輪收以聞

會典

七年議准重囚於臨決前一日卽訴鼓狀該科薄暮封進
凡應決應留囚數姓名次日午前傳出午後不須覆奏卽
便行刑

十年議准重囚家屬於二覆奏命下之日投遞鼓狀該科

參詳與三覆本同封進取旨行刑

已上王
折考

二十四年六月龍江衛吏以母喪乞終制吏部尙書詹徽
不聽吏徑至午門外擊登聞鼓訴之上切責徽聽吏終喪

刑法
志

龍陽瀕洞庭數罹水患逋賦數十萬典史青文勝詣闕上
疏爲民請命再上皆不報復具疏擊登聞鼓以進遂自經
於鼓下上聞大驚詔寬龍陽租二萬四千餘石定爲額

青
文

勝
傳

宣德元年直登聞鼓給事中林富奏重囚二十七人以姦
盜當決擊鼓訴冤煩瀆不可宥帝曰登聞鼓之設正以達

下情何謂煩瀆自後凡擊鼓訴冤阻遏者罪

刑法志

二年二月乙亥諭直登聞鼓給事中曰朝廷慮刑獄有冤下情不能達故設登聞鼓然前代置院設官託耳目於一人非兼聽廣覽之道我國家命六科輪直最得其當爾等毋畏權勢無欺孤莞惟其所言卽時爲達庶幾事無壅蔽

幽隱畢聞

大訓記

天順七年錦衣衛門達誣袁彬罪軍匠楊墳不平擊登聞

鼓爲彬訟冤

三編

成化六年給事中宮榮言近年鼓下詞狀不與覆奏辦理致使冤抑控訴無所自後當與研審明白回奏不許一概

立案其直鼓官亦須詳看曾經他處具告不行者方與封
進從之

通典

正德十三年十月帝在大同大學士楊廷和等言祖制行
刑之日許各犯家屬訴冤於登聞鼓下直鼓給事中封進
或暫停刑者特遣校尉批予留之今冬至將近又當處決
之時該科三覆奏本送下擬票臨刑之時有鳴鼓訴冤狀
者臣下未敢擅便伏望聖駕還京以遵舊制不報

實錄

嘉靖元年廖鵬父子及錢甯王欽等皆以從逆論斬鵬等
黃緣中人冀脫死給事中劉濟上言自死囚臨斬鼓下猶
受訴詞奏上得報已及日盱再請而後行刑則已薄暮殊

非與眾棄之之意乞自三請後鼓下不得受詞鵬欽等罪甚當陛下勿疑詔自今以申酉行刑不報劉濟傳

廷杖

洪武六年工部尙書王肅坐法當笞太祖曰六卿貴重不宜以細故辱命以俸贖罪然永嘉侯朱亮祖父子皆鞭死工部尙書夏祥斃杖下廷杖之刑實自太祖始刑法志

景泰六年八月庚申南京大理少卿廖莊以請復沂王爲太子杖於闕下并杖章綸鍾同於獄本紀

成化十五年五月癸酉以馬文升牟倖事杖給事中李俊御史王濬輩五十六人於闕下同上

南京行杖始於成化十八年南御史李珊等以歲祲請賑帝摘其疏中譎字令錦衣衛詣南京午門前人杖二十至正德間南御史李熙劾貪吏觸怒劉瑾矯旨杖三十

正德十四年以諫止南巡廷杖舒芬黃鞏等百四十六人死者十一人

嘉靖三年羣臣爭大禮廷杖豐熙等百三十四人死者十六人中年刑法益峻雖大臣不免笞辱宣大總督程鵬蒞州巡撫朱方以撤防早宣大總督郭宗皋大同巡撫陳燿以寇入大同刑部侍郎彭黯左都御史屠僑大理卿沈良才以議丁汝夔獄緩戎政侍郎蔣應奎左通政唐國相以

子弟冒功皆逮杖之

已上刑法志

四年林俊疏論曰古者鞭扑之刑辱之而已非必欲糜爛其體膚而致之死者也又非所以加於士大夫也成化時臣及見廷杖二三臣容厚綿底衣重氈疊裏然且沈臥久乃得痊正德時逆瑾竊權始令去衣致末年多杖死臣又見成化宏治間惟叛逆妖言劫盜下詔獄始命打問他犯但言送問而已今一概打問亦非故事乞聖明留念

林俊傳

三十二年正月朔以賀表語乖文體逮禮科給事中楊思忠於午門外杖之百三十三年正月朔以賀表違式逮六

科給事中張思靜等各廷杖四十三

編三

隆慶間給事中石星李己御史詹仰庇尙寶司丞鄭履滄

先後以言事廷杖

錄 夢餘

萬厯六年以爭張居正奪情杖吳中行五人其後盧洪春

孟養浩王德完輩以進言被杖多者至一百

刑法志

自十二

年至三十四年內外官杖戍爲民者共百四十人

錄 夢餘

十六年給事中李沂以劾中官張鯨下詔獄予廷杖閣臣

王錫爵言廷杖非正刑祖宗雖間一行之亦未有詔獄廷

杖并加於一人者故事惟盜賊大獄則有打問之旨今豈

可加之言官不聽

李沂傳

天啟時太監王體乾奉敕大審重笞戚畹李承恩以悅魏忠賢於是萬燦吳裕中斃於杖下臺省力爭不得閣臣葉向高言數十年不行之弊政三見於旬日萬萬不可再行忠賢乃罷廷杖而以所欲殺者悉下鎮撫司士大夫益無噍類矣

刑法志

枷

宣德三年怒御史嚴體方鼎何傑等沈湎酒色不朝參命

枷以徇

刑法志

正統二年七月御史王學敏枷三月九月給事中金昭伯吳繪枷一月言路之辱甚矣至六年枷及戶部尙書劉中

敷侍郎吳璽陳瑞等未幾王振用事祭酒李時勉駙馬都尉焦敬皆受此辱天順復辟後坐法荷校者不可勝紀及憲宗嗣位此禍稍解

野獲編

正德二年正月尙寶卿崔璿湖廣按察副使姚祥工部郎中張瑋以違例乘轎下獄璿以冊封還祥以御史外陞瑋以巡河舊例奉使遠出者率乘轎以爲常至是劉瑾欲厲法禁以示威具內批枷號兩月大學士王鏊謂瑾曰士可殺不可辱今辱且殺之吾輩何顏居此於是李東陽復上言璿等罪犯自有法司論擬若枷號乃至重之典死生係焉由儒生而入官者豈能忍死至一兩月之久命在旦夕

實可矜憐今枷號已數日亦足示懲伏乞稍霽威嚴曲賜矜宥詔始釋之

憲章錄

是年直隸御史王時中荷校於都察院門戶部郎中劉譚荷重校於戶部門

大政記

衛獄

洪武十五年罷儀鑾司改置錦衣衛掌侍衛緝捕刑獄之事鎮撫司隸焉帝時有所誅戮輒下鎮撫司雜治

三編

二十年正月焚錦衣衛刑具時有富民繫衛獄用事者非法凌虐帝聞之怒曰訊鞫法司事也或令錦衣衛審之欲先得其情耳豈令其鍛鍊耶執用事者治之悉焚其刑具

以囚送刑部二十六年復申明其禁詔內外獄毋得上錦衣衛大小咸付三法司

同上

成祖卽位寵幸紀綱令治錦衣親兵復典詔獄綱遂用其黨莊敬袁江王謙李春等緣借作奸數百千端久之族綱而錦衣典詔獄如故

刑法志

英宗復辟錦衣指揮門達鎮撫逯杲俱得幸杲更強鷲日遭校尉偵事四方縱橫無所忌大學士李賢請撤還官校不許

三編

初衛獄附衛治至門達掌問刑又於城西設獄舍拘繫狼

籍達敗用御史呂洪言毀之

刑法志

成化十年都御史李賓言錦衣鎮撫司累獲妖書圖本皆誕妄不經之言小民無知輒被幻惑乞備錄其書名目榜示天下使知畏避免陷刑辟報可緝事者誣告猶不止同上宏治九年刑部吏徐珪上言鎮撫司理刑不宜專用錦衣官乞推選在京各衛一二人及刑部主事一二人共莅其事或三年六年一更則巡捕官校當無有作奸擅刑誣及無辜者矣不聽孫磐傳

十三年令鎮撫司從公審察究問務得真情若有冤枉卽與辦理不許拘定成案濫及無辜王圻考

世宗立革錦衣傳奉官十六汰旗校十五復論緝事官校

惟察不軌妖言人命強盜重事他詞訟及在外州縣事毋得與未幾事多下鎮撫司尙書林俊言祖宗朝以刑獄付法司事無大小皆聽平鞠自劉瑾錢甯用事專任鎮撫司文致冤獄法紀大壞更化善治在今日不宜復以小事撓法御史曹懷亦諫曰朝廷專任一鎮撫法司可以空曹刑官爲冗員矣俱不聽

刑法志

嘉靖元年山東參議韓邦奇奏國家錦衣衛之設以待夫隱罪極惡天子非時震怒特遣下之非以爲常者也然其制列聖相承止行於畿內正德二年以來權奸用事官校四出如豺虎天下洶洶幾至大亂使非聖明繼世中興革

而正之天下未可知也近者聖母駕過山東高唐州同知金波供應有缺陛下詔錦衣衛官校挈至京師天下愕然驚疑謂聖明在上亦復有此夫金波小官何足動天下之聽聞而錦衣官校出京挈人則固天下聽聞之所繫也伏惟陛下特宥金波之罪自後在外府州縣官有犯付之撫按官撫按官有犯付之三法司如此則內外相承體統不紊疏入下都察院覆題

明臣奏議

二年給事中劉最以劾中官逮下詔獄尋編成給事中劉濟言國家置三法司專理刑獄或主質成或主平反權臣不得以恩怨爲出入天子不得以喜怒爲重輕自錦衣鎮

撫之官專理詔獄而法司幾成虛設如最等小過耳羅織於告密之門鍛鍊於詔獄之手旨從內降大臣初不與知爲聖政累非淺帝怒奪濟俸一月

劉濟傳

錦衣革職旗校王邦奇屢乞復職給事中安磐言邦奇等在正德時貪婪搏噬有若虎狼其捕奸盜也或以一人而牽十餘人或以一家而連數十家鍛鍊獄詞付之司寇謂之鑄銅版其緝妖言也或用番役四出搜愚民詭異之書或購奸僧潛行誘愚民彌勒之教然後從而掩之無有解脫謂之種妖言數十年內死者填獄生者號冤今不追正其罪使得保首領亦已幸矣尙敢肆然無忌屢瀆天聽何

爲者哉宜嚴究治絕禍源帝不能從

安磐傳

給事中霍韜言刑獄付三法司足矣錦衣衛復橫撓之昔漢光武尙名節宋太祖刑罰不加衣冠其後忠義之徒爭死效節夫士大夫有罪下刑曹辱矣有重罪廢之誅之可也乃使官校眾執之脫冠裳就桎梏朝列清班暮幽犴獄剛心壯氣銷折殆盡及覆案非罪卽冠帶立朝班武夫悍卒指目之曰某吾辱之某吾繫執之小人無所忌憚君子遂致易行此豪傑所以興山林之思而變故罕仗節之士也願自今典東廠勿預朝議錦衣衛勿典刑獄士夫罪謫廢誅勿加笞杖鎖梏以養廉恥振人心勵士節帝不納

天啟時魏忠賢啟楊左之獄掌鎮撫司許顯純輩定爰書坐贓比較立限嚴督之五日一追比輸金不中程者受全刑曰械曰鐐曰棍曰梭曰夾五毒備具呼晷聲沸自天血肉潰爛宛轉求死不得顯純叱咤自若一夕令諸囚分舍宿於是獄卒曰今夕當有壁挺者壁挺獄中言死也明日漣死光斗等次第皆鎖項拉死

崇禎十五年姜採熊開元下獄帝諭掌衛駱養性潛殺之養性洩上語且言二臣當死宜付所司書其罪使天下明知若陰使臣殺之天下後世謂陛下何如主會大臣多爲

採等言遂得長繫

已上刑
法志

東廠
西廠附

永樂十八年十二月立東廠於東安門北以內監掌之
成化十三年正月別設西廠以太監汪直督之大學士商
輅上言陛下委聽斷於直直又寄耳目於羣小擅作威福
賊虐善良陛下若謂摘奸禁亂爲有益則前此數年何以
帖然無事近自直用事以來人心疑畏卿大夫不安於位
商賈不安於途庶民不安於業若不亟去直天下安危未
可知也疏入帝不悅翼日兵部尙書項忠亦倡九卿劾之
帝不得已令直歸御馬監散諸旗校還錦衣衛未幾以御
史戴縉上書頌汪直功乃復開西廠嗣直數出邊監軍大

學士萬安奏罷西廠

宏治九年刑部吏徐珪上言臣在刑部三年見鞫問盜賊多東廠鎮撫司緝獲或校尉挾私誣陷或爲人報仇或受首惡贓令傍人抵罪刑官洞見其情無敢擅更一字以致枉殺多人臣願陛下革去東廠以絕禍源則太平可致不

聽

已上
三編

正德元年邱聚領東廠復設西廠以命谷大用皆劉瑾黨也兩廠爭用事瑾又改惜薪司外薪廠爲辦事廠榮府舊倉地爲內辦事廠自領之京師謂之內行廠雖東西廠皆在伺察中加酷烈焉瑾誅西廠內行廠俱革獨東廠如故

刑法志

隆慶三年十二月命廠衛刺部院事給事中舒化等上言
廠衛徼巡輦下惟詰奸宄禁盜賊耳駕馭百官乃天子之
權而糾察非法則責在臺諫豈廠衛所得干今命之刺訪
將開羅織之門逞機穽之術禍貽善類使人人重足累息
何以爲治且廠衛非能自廉察必屬之番校陛下不信大
臣反信若屬耶御史劉思賢等亦極陳其害帝並不從化舒
傳

萬厯初馮保以司禮兼廠事建廠東上北門之北曰內廠
而以初建者爲外廠保與張居正興王大臣獄欲族高拱

衛使朱希孝力持之拱得無罪衛猶不大附廠也天啟時魏忠賢提督東廠用衛使田爾耕鎮撫許顯純之徒專以酷虐鉗中外而廠衛之毒極矣

刑法志

莊烈帝卽位忠賢伏誅而王體乾王永祚鄭之惠李承芳曹化淳王德化王之心王化民齊本正等相繼領廠事告密之風未嘗息也同上崇禎十年御史劉之勃疏陳東廠三弊言東廠司緝訪而內五城外巡按以及刑部大理皆不舉其職此不便於官守假捏姓名一紙株連萬金立罄此不便於民生子弟訐父兄奴僕訐家主部民訐官長東廠皆樂聞此不便於國體帝納其言

劉之勃傳

十五年御史楊仁愿疏自東廠興緝事之害積而益重臣聞番役懸價以買事件甚至誘人爲姦盜而賣與番役則誘者獲利挾仇忿以首告而證以惡棍則挾者逞志廠臣豈不三令五申禁之然比較事件而又欲令其不買事件是吹薪止沸必不得之數也夫設阱布罟以待魚鳥人猶哀之况餌人以陷禍惟恐其不卽罹吾網羅揆之皇上泣罪解網之心豈不傷哉伏望先寬東廠事件而後比較可緩比較緩而後買事件與賣事件亦息皇上勿急於求彼亦不必急於得如是而積重之勢稍殺匪惟輦轂蒙休內外關通之事且不期自息矣

夢餘錄

駕帖

故事廠衛有所逮必取原奏情事送刑部發簽駕帖駕帖發下須從刑科批定若科中遏止卽主上亦無如之何如王振汪直二豎用事時緹騎徧天下尚不敢違此例也野獲編

正統元年令重囚三覆奏畢仍請駕帖赴錦衣衛監刑官

領校尉詣法司取囚赴市

通典

成化十二年王恕疏近聞雲南中衛百戶汪清自京師齎駕帖與刑部郎中鍾蕃錦衣衛百戶宋鑑臣竊疑焉臣聞駕帖下各衙門則用司禮監印信該科掛號皇城各門印

印信卷之一
三
照出關防所以防詐僞也今齋來駕帖既無監科印信字號又無各衙門關防且原差郎中鍾蕃等於本年九月初六日到雲南提犯人盧安等到官鞫問百戶汪清又齋駕帖於本月十一日到送與蕃等事體不一非唯啟人之疑且使投間抵隙者得以行其詐而濟其私敢據實爲陛下言之疏入改恕南京兵部

明臣
奏議

宏治元年刑部尙書何喬新言舊制提人所在官司必驗精微批文與符號相合然後發遣此祖宗防微杜漸深意也近者中外提人止憑駕帖既不用符眞僞莫辨奸人矯命何以拒之請給批文如故帝曰此祖宗舊例不可廢命

復行之刑法志

十八年奸人徐俊等造謠言帝遣官齋駕帖至南京有所
捕治已而知其妄南京御史李熙等言陛下於此事威與
明少損矣倘奸人效尤妄以蜚語中善類害何可勝言事
下法司亦力言駕帖之害帝納之陸崑傳

嘉靖元年十二月辛丑刑科都給事中劉濟言故事廠衛
有所逮必取原奏情事送刑科簽發駕帖今千戶白壽齋
帖至并無原奏索之不與未便簽發而壽執自來駕帖送
科皆開寫事略會同署名實不係御批原本兩人列詞並
上而帝先入壽言竟紬濟議劉濟傳

萬厯元年王大臣事起馮保密差數校至高拱所脅令自裁拱呼校面詰索駕帖觀之諸校詞窘謂廠衛遣來奉慰耳野獲編

天啟中魏忠賢遣使者逮黃尊素至蘇州適城中擊殺逮周順昌旗尉其城外人并擊逮尊素者逮者失駕帖不敢

至黃尊素傳

明會要卷六十七終

明會要卷六十八

永新龍

祥異一

符瑞

太祖生於元天厯戊辰之九月丁丑其夕紅光滿室自是
夜數有光起鄰人望見驚以爲火輒奔救至則無有紀本

太祖西至合肥厯光固汝潁諸州道病輒見兩紫衣人與
俱病瘥遂不見嘗夜陷麻湖中遇羣兒呼迎聖駕叱之絕
迹劉基遊西湖有異雲起西北諸同遊者皆以爲慶雲將
分賦詩基獨縱飲不顧大言曰此天子氣也十年後應在

金陵我當輔之

紀事本末

洪武二年十月甲戌甘露降於鍾山羣臣請告廟不許

紀本

三年鳳翔進瑞麥有一莖五穗三穗二穗者帝謂廷臣曰朕觀自古以來無金革鬪爭之事時和歲豐風俗樸厚方足爲瑞若此麥一物之異非天下之瑞也

大訓記

時甘露屢降帝問宋濂災祥之故對曰受命不於天於其人休符不於祥於其仁春秋書異不書祥爲是故也

宋濂傳

十九年四月癸巳五色雲再見禮部請表賀不許

大政記

永樂二年九月丙午周王橚來朝獻騶虞百官請賀帝曰祥瑞之來易令人驕是以明主遇祥自警未聞因祥自怠

騶虞若果爲祥在朕更當脩省

三編

四年十一月己巳甘露降孝陵松柏醴泉出神樂觀薦之

太廟賜百官

大政記

十一年五月丁未曹縣獻騶虞禮官請賀不許

同上

十三年貴州布政使蔣廷瓚言去年班師詔至思南大巖山有呼萬歲者三呂震言此山川效靈帝曰山谷之靈空虛相應理或有之震爲國大臣不能辯其非又欲因之進媚豈君子事君之道金水河太液池冰具樓閣龍鳳花卉狀帝召羣臣觀之震因請賀不許而隆平侯張信奏太和山五色雲見侍郎胡濙圖上瑞光榔梅震率羣臣先後表

賀云呂震傳

宣德八年閏八月辛亥朔西域貢麒麟禮官請表賀帝曰遠方之物朕非有愛但念其盡誠遠來故受之不足賀也

三編

十年英宗嗣位龍州宣撫司以瑞麥獻有一莖六穗七穗者詔曰今旱蝗相望獨一方稱瑞如天下飢民何自今有若此類者毋獻

嘉靖七年四月甘露降告於郊廟是年春靈寶人言黃河清者五十里遣太常往祭告於是告祥瑞者踵至矣

二十五年十月以醴泉出承華殿停諸司封奏三編

上編

三十七年七月胡宗憲獻白鹿者再帝告謝元極寶殿及

太廟百官表賀

宗憲傳

自是靈芝白龜白雁玉兔西苑嘉禾

顯陵甘露無不告廟稱賀者

陶仲文傳

十月禮部進瑞芝一千八百六十本詔廣求徑尺以上者

初四方所獻芝皆積苑中中使竊出市人復進以邀賞王

金乃厚結中使得芝萬本聚爲一山號萬歲芝山

三編

四十四年六月甲戌芝生睿宗廟柱告廟受賀遂建玉芝

宮

同上

日食

洪武十六二年五月甲午朔四年九月庚戌朔六年三

月癸卯朔七年二月丁酉朔八年七月己未朔九年七月
癸丑朔十年十二月乙巳朔十四年十月壬子朔十六年
八月壬申朔十九年十二月癸未朔二十一年五月甲戌
朔二十二年九月丙寅朔二十三年九月庚寅朔二十四
年三月戊子朔二十六年七月甲辰朔三十年五月壬子
朔

建文一 二年三月丙寅朔

永樂八 四年六月己未朔七年九月庚午朔十一年正
月辛巳朔先是鴻臚寺奏習元旦賀儀楊士奇曰日食天
變之大者前代元旦日食多不受賀帝從之敕曰朕乖治

理上累三光眾陽之宗薄食元旦羣臣尙勉輔朕消弭災
變朝賀宴會其悉罷免十三年五月丁酉朔十八年八月
丁酉朔十九年八月辛卯朔二十年正月己未朔罷朝會
二十一年六月庚戌朔

宣德三 五年八月己巳朔陰雨不見禮部請表賀不許
七年正月辛酉朔免朝賀十年十一月戊辰朔

正統四 六年正月己亥朔欽天監言日食不應禮官請
表賀不許九年十月丙午朔十年四月甲辰朔十二年八
月庚申朔

景泰四 二年六月戊辰朔日當食不見三年十一月己

明倫彙編 家範典 卷之六十一
四
未朔五年四月壬午朔六年四月丙子朔

天順四 四年七月乙亥朔五年十一月丁酉朔七年五月己丑朔八年四月癸未朔日當食不見憲宗下天文生賈信於獄

成化九 三年二月丁酉朔五年六月癸丑朔六年六月戊申朔九年四月辛酉朔十年九月癸丑朔十一年九月丁未朔十二年二月乙亥朔二十年九月乙酉朔二十一年八月己卯朔

宏治七

元年六月癸巳朔

本紀系之癸巳證之大政記二申錄皆同惟三編作癸亥

亥系巳字之譌

二年十二月甲申朔八年二月乙卯朔十一年閏

十一月壬戌朔十三年五月甲寅朔十四年九月丙子朔十五年九月庚午朔

正德六年二年正月乙亥朔九年八月辛卯朔十年十二月癸丑朔是日車駕當出視郊祀牲禮部請改次日因言祀牲乃郊祀之始日食乃天變之大今大禮將舉忽遭此變上天示戒昭然伏望順承天意益加敬畏則天心感格災變不足弭矣不納十二年六月乙巳朔十三年五月己亥朔十六年三月癸丑朔

嘉靖十五年四年閏十二月乙卯朔六年五月丁丑朔八年十月癸亥朔十二年八月辛未朔

本紀不載
據三編

二十一年

七月己酉朔二十二年正月丙午朔二十四年五月壬戌
朔二十八年三月辛未朔三十二年正月戊寅朔日當食
不見三十四年十一月壬辰朔三十五年十月丙戌朔四
十年二月辛卯朔本紀不載
據三編七月己丑朔四十三年五月
壬寅朔四十五年四月壬戌朔

隆慶二 四年正月己巳朔

本紀作乙巳乙
乃巳字之譌

以正旦日食

罷元會帝避殿減膳是月月復食給事中陳吾德疏言歲
首日月並食天之大災陛下宜屏斥一切玩好應天以實
報聞六年六月乙卯朔

萬曆十六 三年四月己巳朔日有食之既帝感日食之

變於宮中製牙牌手書十二條於其上所至懸座右以自
警五年閏八月乙酉朔日食不見八年二月辛未朔十年
六月丁亥朔十一年十一月己卯朔十五年九月丁亥朔
日當食不見十六年八月壬午朔本紀未載
據三編十七年正月
己酉朔以日食免元旦朝賀嗣後每元旦皆不視朝矣十
八年七月庚子朔二十二年四月己酉朔二十四年閏八
月乙丑朔三十一年四月丁亥朔是日當享太廟禮部侍
郎郭正域言當祭而日食牲至未殺則廢况時維四月又
爲正陽變異非細是日辰時食至巳時若救護後午刻祭
享曾未踰時兩興大禮精禋不肅宜以朔旦救日詰朝享

廟詔改享太廟於初五日三十二年四月辛巳朔三十八年十一月壬寅朔禮部侍郎翁正春言前兩歲食四月朔純陽之月也今食十一月朔陽生之月也仲冬之月於律爲黃鍾於卦爲復乃羣陰已極一陽初生之候而有此虧蝕其災異尤甚君德象日宜照臨宣布不宜闇汶閉藏自萬曆二十年後財貨日斂聚人材日剝落閭閻徒號天聽愈杳天下不見陽和舒育之氣如在窮陰沍寒之中是以上天譴告如此然日之食與更止在一時而皇上之寢與行止在一念誠翻然轉移日中之治可保无疆矣疏入不省四十年五月甲午朔四十三年三月丁未朔四十四年

三月辛未朔四十五年七月癸亥朔

天啟一 元年四月壬申朔

崇禎六 二年五月乙酉朔四年十月辛丑朔七年三月

丁亥朔十年正月辛丑朔十四年十月癸卯朔十六年二

月乙丑朔

已上皆天文志三編

日月變異

洪武三年自正月至十二月日中屢有黑子詔求直言起居注萬鑑言日者陽精而有黑子陰奸乎陽也德爲陽刑爲陰君子爲陽小人爲陰宜慎刑黜奸

三編

正統元年八月癸酉至己卯月出入時皆有游氣色赤無

光

天文志

九月白虹貫日

二申錄

十四年八月辛未月晝見與日爭明

天順二年閏二月己巳日無光旋赤如赭

六年十月丙子日赤如血七年四月癸未如之

八年二月己亥日無光

成化十三年三月壬申日白無光

十八年四月壬寅日赤無光

宏治元年十一月己卯月生芒如齒長三尺餘色蒼白

十八年八月癸酉至九月甲午日無光

已上天志

正德四年正月蘇州見日初出如日並出者十數至清明

日止二申錄

嘉靖元年正月丁卯日慘白變青無光

天文志

七年正月日重暈生珥右有戟氣

二十四年十二月日輪外屢有黑氣如盤二十九日日忽暗有青黑紫色如日狀者數十相摩久之千百飛蕩滿天向西北而散

隆慶六年五月通州月光晝見月下有二星

已上二申錄

萬曆二十五年三月癸丑黑日二三十餘迴繞日旁移時雲隱不見五月辛卯朔日光轉蕩旋爲黑餅

三十五年十一月丙午日赤無光燭地如血

已上天文志

四十六年四月日中有黑子

四十八年日生交暈如連環下生背氣一道黃白色左右生戟氣青赤色白虹彌天良久始散

天啟元年二月遼陽有數日並出

二年五月日中月星並見孫慎行上疏請脩省

已上三編

四年正月癸未日赤無光有黑子二三蕩於旁漸多至百

許

崇禎四年正月戊辰日色如血照人物皆赤二月乙巳朔日赤如血無光十月丙午月晝見

十一年十一月癸亥日中有黑子及黑青白氣日入時日

光摩蕩如兩日

十二年二月庚子日旁有紅白丸

十三年九月己巳兩日竝出辰刻乃合爲一入時又分爲二

十四年正月壬寅日青無光

已上天
文志

彗孛

洪武元年正月庚寅彗星見於昴畢三月辛卯彗星出昴
北大陵天船間長八尺餘指文昌近五車

六年四月彗星三入紫微垣

已上天
文志

九年七月有星孛於北斗

二申
錄

二十四年四月丙子彗星二入紫微垣

天文志

永樂五年十一月丙寅彗星見諭趙王高燧曰彗星見燕

分爾宜謹慎出入伺察邊境毋或怠忽

三編

十三年八月有星孛於南斗

二申錄

宣德六年四月戊戌有星孛於東井

七年正月壬戌彗星出東方

八年閏八月壬子彗星出天倉旁

正統四年閏二月彗星見張宿旁大如彈六月戊寅彗星

見畢宿旁

九年七月庚午彗星見太微東垣

十四年十二月壬子彗星見天市垣市樓旁厯尾度

景泰元年正月壬午彗星出天市垣外掃天紀星

三年三月甲午朔有星孛於畢

已上天
文志

七年四月壬戌彗星東北見於胃敕內外羣臣脩省

三編

天順元年五月丙戌彗星見於危

五年六月戊戌彗星見東方指西南入井度

成化元年二月彗星見

已上天
文志

四年七月有星孛於台斗

二申
錄

九月癸亥有客星蒼白色

芒長三丈尾指西南變爲彗星掃三台越五十八日乃滅

七年十二月甲戌彗星犯紫微光長竟天正晝猶見帝避

正殿撤樂赦羣臣脩省條時政得失彗至明年正月乃滅

已上
三編

八年正月彗星見軒轅

二申
錄

宏治三年十一月戊戌有星孛於天津詔羣臣言闕失

十三年四月甲午彗星見室壁間至五月辛巳入紫微垣

正德元年七月庚子彗星見光流東南長三尺越三日長

五尺許掃下台入太微垣時八黨竊柄朝政日非而災異

疊見於是南京御史陸崑偕同官上疏極諫帝不省

已上
三編

十五年正月彗星見

十六年正月有星孛於東南

已上二
申錄

嘉靖二年六月有星孛於天市

天文志

十年六月乙巳彗星見東井閏月甲寅彗星見東井

二申錄

十一年八月彗星見東井芒長丈餘掃太微垣及角宿天門凡一百五十有五日乃減南京御史馮恩上疏以張孚敬爲根本之彗汪鉉爲心腹之彗方獻夫爲門庭之彗三彗不除庶政終不可理帝得疏大怒逮下獄論死

三編

十二年六月彗出昴畢射天漢八月彗星復出東井

十五年三月彗星見東南

已上二申錄

十八年四月庚戌彗星見光長三尺許指東南旬日始滅三十二年五月癸亥彗星見天權旁犯文昌二十七日而

沒

三十五年正月庚辰彗星見進賢旁西南指

三十六年九月戊辰彗星見天市垣列肆旁東北指

隆慶三年十月辛丑朔彗星見天市垣東北指

已上天
文志

萬曆四年七月彗星見

二申
錄

五年十月戊子彗星從東南方起長亙天人情洶洶指目
張居正至懸謗書通衢帝詔諭羣臣再及者誅無赦謗乃

已

三編

八年八月庚申彗星見東南方每夜漸長縱橫河漢凡七

十日有奇

天文
志

九年三月彗星見紫微垣尾光芒射西北

二申錄

十年四月丙辰彗星見西北形如匹練尾指五車

十三年九月戊子彗星出羽林傍長尺許每夕移東行芒

漸小

十九年三月丙辰彗星見於西北厯胃室壁至閏三月入

婁

二十一年七月乙卯彗星見東井乙亥逆行入紫微垣犯
華蓋王錫爵密奏古帝王禳彗之法或更張新政或更用
新人一切以除穢布新爲義若彗入紫微垣王者之宮則
咎在君身必非區區用人行政之間所能消弭竊惟天子

明彗考卷之六
三
之象曰帝星太子之象曰前星臣以爲方今禳彗之第一義無過早行冊立之典

二十四年六月彗星見

三十五年八月辛酉朔彗星見於井指西南漸往西北至丁丑歷於房兵科給事中宋一韓上言春秋二百四十年孛見者一終綱目之世彗見十七今彗星復見東井其咎安在臣謹按星野東井秦分彗尾指西南漸往西北又指秦地秦其急乎且彗者掃除之象刑人之職也小人用之以掃除爲職君子用之以除舊布新今李鳳鯨噬於粵東潘相蝮螫於江右其他諸處內使其爲掃除之役等耳宜

因此變悉撤之因而一新舊令整飭政事以紓萬民之困
不報

四十六年十月乙丑彗星見於氏

四十七年正月彗星見東南長數百丈光芒下射末曲而
銳或曰蚩尤旗時方議進師遼陽識者以爲兵敗之兆已上

三編

崇禎十二年十月彗星見

十三年十月丙戌彗星見

已上天
文志

五星陵犯

洪武元年七月熒惑犯上將九月太白犯上將

二申
錄

六年三月戊申熒惑犯填星六月壬辰太白犯歲星

八年三月癸亥熒惑犯填星

已上天
文志

九年七月熒惑犯上將九月太白又犯之

二申
錄

二十二年六月丙辰辰星犯太白

二十七年三月乙丑熒惑犯歲星於奎

已上天
文志

三十一年惠帝卽位十月熒惑守心詔求直言

三編

永樂三年三月戊戌太白犯歲星十一月癸巳朔太白犯
辰星於箕

四年正月癸卯太白犯歲星

五年七月甲子熒惑犯填星

十二年十一月丁卯太白犯歲星

十四年七月乙巳太白犯填星

二十年九月乙亥太白犯歲星十月己酉太白犯填星

洪熙元年十一月丙午太白犯填星

宣德元年十一月戊戌辰星犯填星

已上天
文志

六年九月熒惑犯南斗

二申
錄

七年六月己酉太白犯歲星七月辛巳太白犯熒惑

九年十一月己亥太白犯填星

十年十月庚子熒惑犯填星

正統元年五月戊寅太白犯熒惑於井

二年五月辛丑熒惑犯填星

三年十二月戊寅太白犯歲星

五年五月丙午太白犯填星

七年九月戊午太白犯熒惑於氏

十一年九月丁亥太白犯歲星

十二年七月戊午熒惑犯填星

十四年二月己卯太白犯熒惑

已上天
文志

六月熒惑入南斗

時侍講徐理頗知天文私語其友劉溥曰禍不遠矣

三七
編

月丙午熒惑犯填星

景泰元年閏正月丁卯熒惑犯歲星

天順七年十一月乙卯朔熒惑犯填星

成化六年九月己亥太白犯歲星

十一年七月戊辰太白犯填星

十三年九月丙寅熒惑犯填星

十六年六月壬申太白犯歲星

已上天
文志

二十三年八月甲申夜太白犯亢宿

二申
錄

宏治二年正月戊辰太白犯歲星十一月壬午太白犯填星

三年正月庚申太白犯填星五年八月丁未熒惑犯歲星
六年十一月己未太白犯填星

七年九月甲寅及十年正月丙辰熒惑犯歲星十二月庚辰辰星犯歲星

十七年閏四月癸酉歲星犯填星

記上天文志

正德元年八月五星凌犯星斗晝見

二申錄

二年十月癸未熒惑犯填星

八年正月壬午及十六年十二月丙午俱太白犯歲星

嘉靖元年正月己未太白犯歲星十二月甲戌太白犯填星

三年正月癸酉太白犯歲星

記上天文志

二十三年六月熒惑犯南斗

二申錄

二十九年六月庚辰熒惑犯歲星守井

萬曆五年十二月辛丑太白犯填星於斗

九年十二月癸巳太白犯填星入危

十一年六月丁丑太白犯熒惑

十五年五月己亥太白犯填星

二十四年四月己酉太白犯歲星

二十五年七月甲辰熒惑犯歲星

二十七年閏四月庚寅辰星犯太白於井

三十四年十一月庚辰熒惑掩歲星於危甲辰熒惑犯歲

星已上天

文志

明會要卷六十八
三十六年三月熒惑犯填星於斗牛二申錄

三十八年十一月辛亥太白犯填星於虛

四十七年三月壬子太白犯歲星於壁

天啟元年八月丙申熒惑與太白同度者兩日

崇禎九年六月己亥太白犯歲星於張已上天志

十五年四月熒惑犯歲星二申錄

明會要卷六十八終